

Rene Herde(AVP)

Semper CFT lo conseha pa haci mas

ORANJESTAD - E ultimo comentario di CFT riba e presupuesto 2015 manera aproba, no tin niun sorpresa. CFT ta haya cu mester hisa entrada y baha gasto di gobierno mas y pa haci esaki mas lihe. Nan ta haya cu ta un bon decision di parlamento pa baha e prima di AZV pa trahadonan y aumenta e BAZV cu un porciento. Segun CFT esey ta duna confianza. Tabata di spera cu CFT lo bisa cu no a sigui tur nan consehonan y cu segun nan mester haci mas pa subi entrada y baha gasto. Nan a pone esey den tur nan consehonan. CFT lo sigui conseha esey.

Nos mester custumbra cu CFT semper lo sigui conseha pa hisa entrada di gobierno mas y baha gasto mas y mas lihe. Pa CFT nunca ta basta. Nan unico meta y tarea ta pa baha e deficit den presupuesto mas lihe posibel. Nan no tin otro meta y nan no ta tene cuenta cu nada otro! P'esey e rol di nan consejo ta limita tambe. Ta na Parlamento y Gobierno pa tene cuenta cu tur otro interes di pueblo, manera e forsa di compra y nivel di entrada di pueblo. Ta na Parlamento y Gobierno pa cuida nos economia y no tuma decisionnan pa stroba esaki of stroba creacion di mas cupo di trabao.

Normanan di presupuesto

Loke gobierno mester cumpli cun'e ta e normanan cu a wordo fiha pa baha e deficit y yega e punto di un presupuesto cu e entradanan ta cubri tur e gastonan sin cu falta placa y sin cu tin cu fia placa pa cubri gastonan normal. (= Presupuesto Balan-



sa). E punto ey nos lo yega na 2017. Entre awor y 2017 lo sigui baha e deficit te yega 0%. E aña aki e norma ta pa e deficit yega 3.7%. Te awor gobierno a cumpli cu e norma ey. CFT ta bisa cu e no ta kere cu lo logra baha e gastonan di aumenta entradanan pa yega 3.7%. P'esey nan ta conseha pa baha gasto mas y hisa entrada mas. Gobierno si ta kere cu e ta logra cumpli cu e norma. Basa riba e cifranan di Departamento di Financia, awor aki e deficit di presupuesto ta na 3.7%. Te awor aki gobierno a cumpli!

E realidad ta cu e norma di 3.7% di deficit ta e norma final cu ta uza pa husga si gobierno a cumpli cu palabracion si of no. Niun otro opinion of consejo

ta conta. E consehonan di CFT pa subi entrada of pa baha gasto, ta consehonan di nan banda na gobierno, con segun CFT mester yega na cumpli cu e norma di 3.7%. Na fin di dia ta Parlamento cu ta controla gobierno y gobierno mes, ta dicidi kico nan ta haci pa cumpli cu e norma di 3.7% di deficit. Rene Herde: "Contrario na CFT cu ta wak e cifranan di financia publico so, nos si ta wak con ta baha gasto of subi entrada sin afecta nos economia y sin stroba creacion di cuponan di trabao nobo. Nos si ta tene cuenta cu e forsa di compra di pueblo. P'esey nos no por sigui tur e consehonan di CFT sin mas. Nos ta wak nan consejo y midi nan efecto, prome cu dicidi di sigui nan. Te awor e maneho di reforma financia publico den un forma gradua la funciona. No a tuma medida pisa manera CFT y oposicion si kier. Ta e normanan ta conta. No si ta sigui tur consejo di CFT." Segun Rene Herde' mester custumbra cu CFT semper lo propone pa haci mas pa hisa entrada y baha gasto di gobierno. Pero nan no tin cun'e a costo di kico ta haci esey. Nan no tin cun'e kico e consecuencia di nan consehonan ta. Wak kico a sosode na Corsou! Gobierno y Parlamento di Aruba si ta tene cuenta cu loke cada decision por nifica pa pueblo y pa nos economia. Rene Herde: "Nos a dicidi di bay poco poco, gradualmente. Ta asina nos a saca nos pais for di decadencia social, desempleo haltisimo di 12% y caida di economia cu 15% entre 2009 y 2013. Awor nos ta haci mescos pa reforma financia publico. Pero semper ta pueblo y nos economia ta conta mas pa nos. No djis e cifranan." Asina Rene Herde' a enfatisa. □